

Solt ein andern drum habn gestraffe/
 Nit weis ich wers mit im hat gschaffe/
 Das ers thet zu derselbign stund/
 Wie höfflich er da streichen kund/
 Das rote Thier wie man das nent/
 Hat ein diecken schwanz/wer es kent/
 Ich kans auff dismal nicht recht nennen/
 Doch istis gern hünner/Benz vñ Hennen/
 Ich wil im drum nit werden gram/
 Das im das Thier so nahent kam/
 Des ich mich nicht verwundern kan/
 Das er ein solches hat gethan/
 Es deucht mich aber gar nit recht/
 Man solt dem herren wie dem knecht/
 Auff den schiesstedten gleichsfals messn/
 Schiesordnung halten nit vorgessn/
 Weil er vornembster siebner war/
 Den andern schützen gestelt dar/
 Alle sachen helffn zu schlichten/
 Ich wil in darumb nicht richten/
 Den Herrn vñ schützen wil ichs heimstelln/
 Die werdn das vrteil wol selbr felln/
 Wo er hin kömpt auff ein Schießstad/
 Bieleicht wird im erzeiget genad/